



Inatsisartunut ilaasortaq Villy Olsvig, Inuit Ataqatigiit

Aalisariutit pillugit § 37 naapertorlugu apeqquteqaammut 2017-167-imut akissut

05-07-2017
Sags nr.: 2017-14224
Dok. nr. 21494559

Apeqqutinut Inatsisartut Suleriaasianni § 37 naapertorlugu nassiussarnut qujanaq. Apeqqutit matuma kinguliani ataasiakkaarlugit akissuteqarfigineqarput.

Apeqqut 1. Angallatit kiviinnarnikut inoqarfiit illoqarfiit talittarfeqarfiini ersiinnartumiittut kimit oqartussaaffigineqarpat?

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Akissut:

Umiarsualivinni malittarisassaqaartitsineq pillugu Namminersornerullutik Oqartussat nalunaarutaat nr. 1, 4 januari 2000-imeersoq malillugu aallaaviatigut umiarsuarmik piginnittup umiarsuaq akisussaaffigaa, taamaattumik sutigut tamatigut piginnittup akiligassarissusaavaa annaasaqaatigisinnaallugulu. Taamaattoq umiarsuit kivisimasut piffissap naleqquttup iluani nuunneqarnissaat umiarsualivimmuut oqartussap piumasarissinnaavaa. Umiarsualivimmuut oqartussap peqqusissutaa naammassineqanngippat, umiarsualivimmuut oqartussap piffissamut killililusseqqereernerup kingorna, piginnittup akiligassaanik umiarsuup peerneqarnissaa tunineqarnissaalu isumagitissinnaavaa.

Apeqqut 2. Kommunip immaqaluunniit Namminersorlutik Oqartussat pisussaaffiginerpai taamaattut peersinneqarnissai?

Akissut:

Apeqqummut 1-imut akissuteqaammi oqaatigineqartutut, tamanna siullermik pingaarnertullu umiarsuup piginnittuata akisussaaffigaa. Kommuni imaluunniit Namminersorlutik Oqartussat akisussaasuunersut, umiarsuaq umiarsualivimmi sumi aammalu sorlermi inissisimanersoq, apeqqutaavoq.

Umiarsualivinni malittarisassaqaartitsineq pillugu Namminersornerullutik Oqartussat nalunaarutaat nr. 1, 4 januari 2000-imeersumi § 1, imm. 2 malillugu tamanna ajornanngippat, killilersorneqanngitsumik akornuteqanngitsumillu umiarsualivimmukarsinnaanissaq, umiarsualivimmuut oqartussaasup akisussaaffigaa. Umiarsualivinni malittarisassat taakkua, umiarsualiveqarfiit sunngiffimmuut siunertaqartut, kiisalu Kangilinnugit aamma Pituffik eqqaassanngikkaanni, Kalaallit Nunaanni umiarsualivinnut aamma talittarfinnut tamaginnut atuupput. Umiarsualivinnut oqartussaasoqarneq, umiarsualiveqarfinnut il.il. toqqaannartumik tankeqarfimmuut ilaasunut, atuutinngilaq, tassami taakkua Pilersuisoq A/S-imit pigineqarmata.

Apeqqut 3. Royal Arctic Line-ip pisussaaffiginerpai talittarfinnik nakkutilliisutut taamaattut peerneqarnissaat?

Akissut:

Royal Arctic Line-p illoqarfinni annerusuni 12-ini najukkami umiarsualivimmi oqartussaasutut suliaqarneq Namminersorlutik Oqartussat sinnerlugit ingerlappaa, taamaalillunilu pissutsit, soorlu umiarsuit kivisimasut, Kommunit, Nunaqarfinnut, Isorliunerusunut, Attaveqaqatigiinnermut Ineqarnermullu Naalackersuisoqarfimmi qitiusumi umiarsualivinnut oqartussaasumut nalunaarutiginnissaannut, pisussaaffeqarluni. Tamatuma kingorna qitiusumi umiarsualivinnut oqartussaasup suliap ingerlaqqinnissaa nalilersortarpaa.

Apeqqut 4. Peerneqarniarneranni kiap/kikkut aningaasartuuteqarfiginiartussaavaat?

Akissut:

Aallaaviatigut umiarsuup piginnittuata umiarsuit taakkua peerneqarnerannut aningaasartuutit matussusertussaavai. Taamaattoq amerlanertigut tamanna ajornartarpoq, taamaalilluni aningaasartuuteqarnissaq Namminersorlutik Oqartussanut tuttarluni.

Apeqqut 5. Angalaqqissinnaanissaat ilimananngimmat isaterneqarneri kiap aningaasartuutigissanerpai?

Akissut:

Aallaaviatigut isaterneqarnerannut atatillugu aningaasartuutit umiarsuup piginnittuata matussusertussaavai. Taamaattoq amerlanertigut tamanna ajornartarpoq, taamaalilluni aningaasartuuteqarnissaq Namminersorlutik Oqartussanut tuttarluni.

Allakkanni assersuutit eqqaasatit pillugit naggasiutigalugu paasissutissiissutigisinnavaara, umiarsuaq Sisimiuni uninngasarfittut umiarsualivimmi kiveqqasimasoq qaqqinneqarnikummat. Piginnittoq peersitsinermik akiliisinniarlugu inatsisilerinikkut suliaqarneq aallartinneqarnikuvoq.

Umiarsuaq, soorlu illit eqqaagit Aasiaat talittarfianiittoq, ilisimasara naapertorlugu amutsiviup eqqaaniippoq, taannalu Namminersorlutik Oqartussat umiarsualivinni oqartussaaffiata avataaniippoq. Taamaammatt umiarsuup taassuma peerneqarnissaa Namminersorlutik Oqartussat akisussaaffiginngilaat.

Neriuppunga qulaani allaqqasuni apeqqutitit akineqartut.

Inussiarnersumik inuulluaqqusillunga

Erik Jensen